

TONGEI ARAMAS

ASUKULER





TONGEI ARAMAS

ASUKULER

It _____

Mwichefel _____

Photo Credits: Page 28: NASA, ESA and the Hubble Heritage Team (STScI/AURA)-ESA/Hubble Collaboration. Licensed under CC BY 4.0 (<http://creativecommons.org/licenses/by/4.0/>). Source: <https://esahubble.org/images/heic0702a/>; page 29: Based on NASA/Visible Earth imagery

Ei puk esap minen amémé. A kawor fân iten eú angangen asukula aramas wóón unusen fénúfan ussun ewe Paipel, nge ei angang a tufich pokiten án aramas awora monien asor.

Ren óm kopwe awora monien asor, kese mochen ló ngeni donate.jw.org.

Iká ese affatetiwi menni Paipel ekkewe wokisin lón Tesin Ipru ra feito seni, sia néúnéu ewe Paipel itan *Paipel are Testamentin Lom me Testament Söfö*, me ekkewe wokisin lón Tesin Krik ra feito seni ewe Paipel itan *Kapasen Kot —Paipelin Ótót Séfé (Mattu-Pwáaraatá)*.

Love People—Make Disciples

A ffér lón July 2024

Chuukese (*Imd-TE*)

© 2024

Watch Tower Bible and Tract Society of Pennsylvania

Chón Féri

Watchtower Bible and Tract Society of New York, Inc.
Wallkill, New York, U.S.A.

Made in Japan
A ffér lón Japan

Eché Taropwe Seni ewe Mwichen Soupwúngúpwúng

Pwiim mi Áchengicheng:

Ach tongei Kot me aramas a amwékútúkich ach sipwe apwénúetá alon Paipel ei: “Oupwe feiló me asukula aramasen mwú meinisín pwe repwe wiliiti chón tapwoto mwiri, me papataisiir.” (Mat. 28:19, 20; Mark 12: 28-31) A fókkun watte manamanen ewe esin tong ese pwisin achéchééi. A tongeni achchúngú chókkewe “letiper a páengeni ar repwe etiwa ewe enlet mi awora manaw esemuch.”—Féf. 13:48.

Lón ekkewe ier a ló, sia kan nefótófót wóón ach sipwe émwéchúnúkú met sipwe eáni afalafal me likit ngeni aramas néúch kewe puk. Nge iei, a lamot sipwe angang wóón ach émúrinnéló napanapach le fós ngeni aramas. Sia mochen pwáári ach tongei aramas ren ach pwóróus ngeniir wóón met ekkewe **ra mochen rong ussun**. Weween sipwe tipemeche-res le ekkesiwili met sipwe afalafal wóón, me ekieki met emén me emén iir ra lólieniesini me met ra mochen rong ussun. Ifa ussun ei brochure a tongeni álisikich le féri ena?

A wor 12 lesen lón ei brochure mi áiti ngenikich ekkóch napanap mi lamot sipwe áamáaraatá pwe sipwe pwáári ach tongei aramas me álisiir ar repwe wiliiti néún Jises chón káé. Eú me eú lesen a lóngólóng wóón eú pwóróus lón Paipel mi menlapei eú napanap Jises are ekkewe Chón Kraist lóóm ra pwáári lón ar angangen afalafal. Ei brochure epwe álisikich le kútta alen ach sipwe pwáári tong ngeni aramas, nge esap ach sipwe émwéchúnúkú eú afalafal sipwe eáni. Inaamwo iká eú me eú ekkena napanap ra lamot lón meinisín kinikinin ach angangen afalafal, nge sipwe pwóróus wóón ifa ussun ekkóch ekkena napanap ra fókkun lamot atun sipwe poputááni ach fós ngeni aramas, ekkóch lón ach liwiniti aramas, me ekkóch lón ach káé ngeni aramas.

Atun ka káé eú me eú lesen, ekiekifichi ifa ussun ka tongeni apwénúetá ewe napanap atun óm fós ngeni ekkewe aramas lón leeniom we. Achocho le apéchékkúlaló óm tongei Jiowa me aramas. Ese wor och mettóch epwe kon múrinné seni ena tong epwe álisuk lón óm achocho le álisi aramas ar repwe wiliiti néún Jises chón káé.

Áúa fókkun pwapwa ren ach angangfengen lón ei angang. (Sef. 3:9) Amwo Jiowa epwe efeiéchúkemi lón ámi sópweeló le tongei aramas me álisiir le wiliiti néún Jises chón káé!

Pwiimi kewe,
Mwichen Soupwúngúpwúng án Chón Pwáaraatá Jiowa

Masouan

KINIKIN 1: POPUTÁÁNI EÚ PWÓRÓUSFENGEN

LESEN

| | |
|-------------------------------|---|
| Fós Ussun Met ewe Emén A Sani | 1 |
| Fós fán Chiechiéch | 2 |
| Kirekiréch | 3 |
| Tipetekison | 4 |
| Pwáári Súfél | 5 |
| Kosap Pireir le Afalafal | 6 |

KINIKIN 2: LIWINITI

LESEN

| | |
|-------------------------|---|
| Tinikken | 7 |
| Mosonottam | 8 |
| Meefieni Meefien Aramas | 9 |

KINIKIN 3: ÁLISI LE WILIITI NÉÚN JISES CHÓN KÁÉ

LESEN

| | |
|-------------------|----|
| Tipeppós | 10 |
| Kapas mi Mecheres | 11 |
| Tipepworda | 12 |

APPENDIX

| | |
|---|---|
| Pwórous mi Enlet Sia Fókkun Mochen Áiti Ngeni Aramas | A |
| Itá Kopwe Aúkatiw Ámi Pwórousfengen? | B |
| Ussun Ach Néúnéú ewe Puk <i>Eáni Manaw mi Pwapwa Tori Feilfeiló Chék!</i> le Káé Ngeni Emén | C |

1

Jon 4:6-9



Fós Ussun Met ewe Emén A Sani

Kapasen Emmwen: “Tong . . . ese kútta pwisin mochenin.”—1 Kor. 13:4, 5.

Minne Jises A Féri

1. Katol ei **VIDEO**, are **álleani Jon 4:6-9**. Mwirin pwóróusfengen wóón ekkeei kapas eis:

- Met Jises a esilla ussun ewe fefin me mwen an poputá le fós ngeni?
- Jises a erá: “Kese mochen kopwe ngeniei och konik.” Pwata an féri ena a mmen álilliséch lón an poputááni eú pwóróusfengen?

Met Sia Káé Seni Jises?

2. Iká sia poputá le fósun och mettóch ewe emén a sani, ese mwáál ach pwóróusfengen epwe fisiéch.



VIDEO: *Jises me ewe
Fefin Ppen ewe lto*

Áppirú Jises

3. **Tipemecheres.** Kosap péchéú le poputááni eú pwóróusfengen **ka** ekiekin fósun. Kopwe poputá le fós ussun och mettóch **ekkewe ekkóch** ra ekieki lón ena ránin. Pwisin eisinuk:

- a. ‘Met sókkun pwóróus a nóm lón news?’
- b. ‘Met chón órui kewe, chienei chón angang, are chienei chón sukul ra kan fós ussun?’

4. **Ekieki nónnómun ewe emén.** Pwisin eisinuk:

- a. ‘Met ewe emén a kan féfféri? Epwe met a ekieki ussun?’
- b. ‘Met fouten ewe emén, napanapan, are imwan a áiti ngeniei ussun an lúkú are an ééreni?’
- c. ‘lei ewe fansoun mi fich ái úpwe fós ngeni ei emén?’

5. **Aúseling.**

- a. Kosap kon fós chómmóng.
- b. Pesei ewe emén an epwe uwawu meefian. Iká mi fich, eisini ekkóch kapas eis.

PWAL PPII

Mat. 7:12; 1 Kor. 9:20-23; Fil. 2:4; Jem. 1:19

2

Féf. 8:30, 31



Fós fán Chiechiéch

Kapasen Emmwen: “Eu kapas eman a apasa lon fansoun fich a usun chök ekewe föün ringo mi oleol usun kolt mi nom lon eu sepi seni silifer.”
—SalF. 25:11.

Minne Filip A Féri



VIDEO: *Filip A Afalafal Ngeni Emén lunók Re Itiopia*

1. Katol ei **VIDEO**, are **álleani Féffér 8:30, 31**. Mwirin pwóróusfengen wóón ekkeei kapas eis:
 - a. Ifa ussun Filip a poputááni ewe pwóróusfengen?
 - b. Pwata sia tongeni erá pwe a múrinné napanapen án Filip poputááni ewe pwóróusfengen, me met mwirilóón?

Met Sia Káé Seni Filip?

2. Iká sia chék akkaasoos ngeni emén tori an a suuk alen ach sipwe afalafal ngeni, iwe eli epwe kinamwe me tipemecheres le aúseling ngenikich.

Áppirú Filip

3. **Ekieki nónnómun ewe emén.** Wówóón me nikinikin emén a tongeni áiti ngenikich chómmóng mettóch ussun i. A pwá me wóón pwe a mochen fós ngonuk? Eli ka tongeni poputá le fós ussun och mettóch seni Paipel ren óm apasa, “En mi silei pwe . . . ?” Kosap echchimwa emén iká ese mochen fós.

4. **Mosonottam.** Kosap ekieki pwe mi lamot óm kopwe mwittir poputá le fós ussun ewe Paipel. Witiwiti ewe fansoun mi fich pwe kopwe tongeni pwóróus wóón fán kinamwe. Fán ekkóch, epwe wewe ngeni óm kopwe witi tori lón pwal eú fansoun oupwap pwóróusfengen wóón.


5. **Tipemecheres.** Eli emén epwe poputá le fós wóón och mettóch kese ekieki pwe epwe eppietá. Ina popun, kopwe tipemecheres le áiti ngeni ena emén och pwóróus mi **aúchea ngeni** seni Paipel inamwo iká a wewe ngeni óm kopwe ekkesiwili met ewe ka ekiekin pwóróus ngeni wóón.

PWAL PPII

SalAf. 3:1, 7; 1 Kor. 9:22; 2 Kor. 2:17; Kol. 4:6

3

Jon 9:1-7



Kirekiréch

Kapasen Emmwen: “Tong a . . . kirekiréch.”
—1 Kor. 13:4.

Minne Jises A Féri

1. Katol ei **VIDEO**, are **álleani Jon 9:1-7**. Mwirin pwóróusfengen wóón ekkei kapas eis:
 - a. Met Jises a akkomw féri, a echikara ewe mwán mi chuun are fós ngeni ussun ewe kapas allim?—Ppii Jon 9:35-38.
 - b. Met meefiom, pwata ewe mwán a tipemecheres le aúseling ngeni Jises?

Met Sia Káé Seni Jises?

2. Emén a tongeni mochen aúseling ngeni ach afalafal iká a meefi pwe sia chúnghú.



VIDEO: *Jises A Echikara*
Emén Mwán mi Chuun

Áppirú Jises

3. Achocho le ekieki meefien ewe emén.

- a. Pwisin eisinuk: 'Epwe met a eáni lólilen? Met sókkun pwóróus a tongeni álisi me epwe sani?' Óm féri ena, epwe álisuk le pwáári kirekiréch seni enletin letipom.
- b. Aúseling ngeni meefian. Iká ka féri ena, ka pwáári pwe ka ekieki met a aúchea me ren. Iká a erenuk meefian wóón och mettóch are fósun eú an osukosuk, kosap erikaló met ena a mochen fós ussun.

4. **Fós fán kirekiréch me súfél.** Lupwen ka tongei emén me enletin mochen álisi, epwe meefi ena seni ngingiin óm kapas. Túmúnú met kopwe apasa me ifa ussun kopwe apasawu, me kosap apasa ekkewe kapas mi tongeni eletipengawa.

5. **Álilliséch.** Kútta eú fansoun mi fich óm kopwe álisi emén. Lupwen sia kirekiréch ngeni, ese mwáál epwe mochen fós ngenikich.

PWAL PPII

Rom 12:15, 16; Kal. 6:10; Ipru 13:16

4

Féf. 26:2, 3



Tipetekison

Kapasen Emmwen: “Fán tipetekison oupwe ekieki pwe ekkewe ekkóch ra tekia senikemi.”—Fil. 2:3.

Minne Paul A Féri

1. Katol ei **VIDEO**, are **álleani Féffér 26:2, 3**. Mwirin pwóróus-fengen wóón ekkeei kapas eis:

- Ifa ussun Paul a pwáári tipetekison lón an fós ngeni King Akripa?
- Met Paul a féri pwe ekkewe chón aúseling repwe mwaar ren ekkewe Taropwe mi Pin me Jiowa nge resap fen mwaar ren?—Ppii Féffér 26:22.

Met Sia Káé Seni Paul?

2. Aramas repwe kon sani le aúseling ach afalafal iká sia fós fán tipetekison me súfél.



VIDEO: Paul A Afalafal
Ngeni King Akripa

Áppirú Paul

3. **Kosap lamalamtekia.** Kosap ámmeeƿ ngeni ewe emén pwe ka silei mettóch meinisin nge i ese silei och mettóch. Fós ngeni fán súfél.

4. **Affata pwe minne ka eáni asukul a feito seni lón Paipel.** Án Kot we Kapas a tongeni achchúngú ekiekin me letipen aramas. Atun sia néúnéú ewe Paipel, sia álisiir ar repwe alónɡa ar lúkú wóón án Kot Kapas.

5. **Kopwe mosonoson.** Kosap péchéú le ánneta pwe mi pwúng met ka apasa. Sise mochen ánini. Pwáári tipetekison ren óm mosonoson me iká mi lamot, kopwe ló seni ewe emén. (SalF. 17:14; Tait. 3:2) Iká kopwe fós fán pwetete, ese mwáál ena emén epwe mochen áúseling ngeni ach afalafal lón pwal eú fansoun.

PWAL PPII

Rom 12:16-18; 1 Kor. 8:1; 2 Kor. 3:5

5

Féf. 17:22, 23



Pwáári Súfél

Kapasen Emmwen: “Fansoun meinisín ámi kapas epwe pwetete.”—Kol. 4:6.

Minne Paul A Féri

1. Katol ei **VIDEO**, are **álleani Féffér 17:22, 23**. Mwirin pwóróusfengen wóón ekkeei kapas eis:

- Met meefien Paul atun a kúna ewe angangen fel mi chofona lón Aten?—Ppii Féffér 17:16.
- Ifa ussun Paul a pwáári súfél ren an áeá minne chón Aten ra lúkú le áiti ngeniir ewe kapas allim lap seni an epwe fen apwúngúúr?

Met Sia Káé Seni Paul?

2. Ese mwáál aramas repwe mochen aúseling ngenikich iká sia filiéchú menni kapas sipwe apasa, ifa ussun sipwe apasawu, me ineet sipwe apasa.



VIDEO: *Paul A Afalafal Ngeni Ekkewe Chón Aten*

Áppirú Paul

3. **Filiéchú menni kapas kopwe apasa.** Áwewe chék, atun ka fós ngeni aramas rese silei masouen Paipel, eli mi lamot kopwe ekkesiwili napanapen óm fós ussun ewe Paipel are ifa ussun kopwe áweweei ussun Jises.

4. **Kosap mwittir le apwúngú emén.** Mut ngeni an epwe apasa-wu meefian. Iká a apasa och mettóch ese tipeeú ngeni áitien ewe Paipel, kosap ánini ngeni. (Jem. 1:19) Iká ka aúseling ngeni meefian, kopwe silei met a lúkú me pwata a lúkú ena.—SalF. 20:5.

5. **Kútta met ka tongeni tipeeú ngeni ewe emén wóón are met ka tongeni apúnga wóón.** Eli a wesewesen lúkú pwe mi pwúng met an we lamalam a eáni lúkú. Achocho le fós ngeni ussun ekkewe mettóch ámi me rúúemén oua tipeeú wóón, me ekis me ekis álisi le weweiti met áitien ewe Paipel.

PWAL PPII

SalF. 25:15; 2 Tim. 2:23-26; 1 Pit. 3:15

6

Luk 19:1-7



Kosap Pireir le Afalafal

*Kapasen Emmwen: 'Áúa chék pwora ren án Kot
álillis pwe áúpwe erenikemi ewe kapas allim.'*
—1 Tes. 2:2.

Minne Jises A Féri

1. Katol ei **VIDEO**, are **álleani Luk 19:1-7**. Mwirin pwóróusfengen wóón ekkeei kapas eis:

- Pwata eli ekkóch ekkewe aramas rese mochen chiechi ngeni Sakios?
- Nge met a amwékútú Jises an epwe áiti ngeni ewe kapas allim?

Met Sia Káé Seni Jises?

2. A lamot ngenikich tipepwora le afalafala pwóróusen ewe Mwú ngeni meínisin aramas.



VIDEO: *Jises A Afalafal*
Ngeni Sakios

Áppirú Jises

3. **Lúkúlúk wóón Jiowa.** Án Kot we manaman a álisi Jises lón an afalafal, me a pwal tongeni álisuk. (Mat. 10:19, 20; Luk 4:18) Tingorei Jiowa óm tipepworda pwe kopwe afalafal ngeni chókkewe ka niwokkusitiir.—Féf. 4:29.

4. **Kosap mwittir apwúngaló och mettóch ussun emén.** Eli sipwe pireir le fós ngeni ekkóch aramas pokiten napanapen inisiir, nónnómun me napanapen manawer, are pokiten ar lúkú. Nge chemeni:

- a. Jiowa me Jises ra tongeni silei masouen letipen aramas, nge kich sise silei.
- b. Sisap féraaló pwe ese fichiiti emén án Jiowa epwe álisi.

5. **Kopwe tipepworda nge pwal pwáári súfél me túmúnúéch.** (Mat. 10:16) Kosap álini. Fán súfél aúkatiw ewe pwóróusfengen iká ewe emén ese mochen aúseling ngeni ewe kapas allim, are iká ka meefi pwe kopwele tolong lón feiengaw.—SalF. 17:14.

PWAL PPII

Féf. 4:31; Efi. 6:19, 20; 2 Tim. 1:7

7


Féf. 19:8-10



Tinikken

Kapasen Emmwen: “Rese úkútiw le sópweeló ar asukul me esilefeili ewe kapas allim.”—Féf. 5:42.

Minne Paul A Féri



VIDEO: *Paul A Tinikken
le Álisi Chón Efixus*

1. Katol ei **VIDEO**, are **álleani Féffér 19:8-10**. Mwirin pwóróus-fengen wóón ekkeei kapas eis:

- Pwata sia silei pwe Paul a tinikken lón an afalafala ewe kapas allim?
- Ineet atun Paul a liwiniti ekkewe mi mochen aúseling pwe epwe asukuler, me ifa úkúúkún ttamen an féri ena?

Met Sia Káé Seni Paul?

2. A lamot sipwe awora ach fansoun me achocho pwe epwe fisiéch ach liwiniti chókkewe sia afalafal ngeniir me poputá le káé ngeniir.

Áppirú Paul

3. **Kopwe fiti tawen ewe emén.** Pwisin eisinuk: ‘Ineet me ia epwe kon éch ngeni ám áúpwe chufengen? Kulók fite epwe tawe ám áúpwe pwóppwórous?’ Kopwe tipemecheres le liwiniti inaamwo iká ewe fansoun a filaatá ese kon éch me reom.

4. **Akkóta ineet oupwe chufengensefál.** Iteiten lesópwólóón ámi pwórousfengen, eisini ineet oua tongeni chufengensefál. Achocho le chuursefáli lón ewe leeni me ewe kulók oua etipeeú wóón.

5. **Kopwe ápilúkúlúk.** Kosap ekieki pwe emén chón imw ese kon nónnómotiw lón imwan are mi busy iteitan ese mochen aúseling ewe kapas allim. (1 Kor. 13:4, 7) Achocho le chekisefáli me pwal áeáéchú óm fansoun.—1 Kor. 9:26.

PWAL PPII

Féf. 10:42; 1 Kor. 9:22, 23; 2 Kor. 4:1; Kal. 6:9

8

Jon 7:3-5
1 Kor. 15:3, 4, 7



Mosonottam

Kapasen Emmwen: “Tong a mosonottam.”
—1 Kor. 13:4.

Minne Jises A Féri



VIDEO: *Jises A Mosonottam*
le Álisi Pwiin We

1. Katol ei **VIDEO**, are **áleani Jon 7:3-5** me **1 Korint 15:3, 4, 7**. Mwirin pwóróusfengen wóón ekkeei kapas eis:
 - a. Me akkomwan, met meefien pwiin Jises kewe ren minne a afalafala?
 - b. Met a pwáári pwe Jises ese fangetá wóón pwiin we itan Jemes?

Met Sia Káé Seni Jises?

2. A lamot sipwe mosonottam pún epwe ttam me mwirin án ekkóch aramas repwe etiwa ewe kapas allim.

Áppirú Jises

3. **Sótuni pwal och mettóch.** Iká emén ese mwittir etiwa an epwe káé ewe Paipel, kosap oumwesi. Iká mi tufich, néúnéú ekkewe video are ekkewe lesen le álisi le weweiti met a fiffis lón eú káéen Paipel me ifa ussun epwe feiéch seni.

4. **Kosap apépééi ngeni ekkewe ekkóch.** Emén me emén aramas ra sókkofesen. Iká emén chón óm famili are emén ka afalafal ngeni a tipemwáramwár le káé Paipel are etiwa eú káit seni Paipel, ekieki pwata a ina ussun. Mi wor eú lúkú lón eú lama-lam a kon áúcheani? Aramasan are chón órun ra kan etipetipa? Mut ngeni och fansoun an epwe mwo ekieki ussun met ka apasa me kúna áúchean met ewe Paipel a apasa.

5. **Ióteki ewe emén mi mochen káé.** Tingorei Jiowa an epwe álisuk le eáni ekiek pwúng me pwáári súfél. Tingorei an epwe álisuk le silei iká ewe emén ese wesewesen mochen káé me iká kopwele úkútiw le chuursefáli.—1 Kor. 9:26.

PWAL PPII

Mark 4:26-28; 1 Kor. 3:5-9; 2 Pit. 3:9

9

Mark 6:30-34



Meefieni Meefien Aramas

Kapasen Emmwen: “Oupwe eti ekkewe mi pwapwa le pwapwa, eti ekkewe mi kechiw le kechiw.”—Rom 12:15.

Minne Jises A Féri

1. Katol ei **VIDEO**, are **álleani Mark 6:30-34**. Mwirin pwóróus-fengen wóón ekkeei kapas eis:

- Pwata Jises me néún kewe aposel ra mochen nóm lón eú leeni nge “epwe chék iir”?
- Met a amwékútú Jises an epwe asukula ewe mwichen aramas?



VIDEO: *Jises A Tongei
ewe Mwichen Aramas*

Met Sia Káé Seni Jises?

2. Sia mochen áiti ngeni aramas ewe kapas allim nge pwal mochen álisiir.

Áppirú Jises

3. **Aúselingéch.** Mut ngeni ewe emén an epwe erenuk meefian. Kosap pékúoló an fós, are mwittir tunaaló meefian me met a eáni lóllilen, are an kapasen eppet. Lupwen ka aúselingéch ngeni, ka pwáár ngeni pwe ka áfánni met a eáni ekiek.

4. **Ekieki ussun ewe emén mi mochen aúseling ngonuk.**

Alóngólóng wóón met ewe oua pwóróusfengen wóón, pwisin eisinuk:

- a. ‘Pwata a lamot an epwe silei ewe enlet?’
- b. ‘Ifa ussun an káé Paipel a tongeni émúrinnéló manawan iei me pwal lón fansoun mwan?’

5. **Pwóróusfengen wóón ekkewe mettóch mi tongeni álisi.**

Achocho le mwittir áiti ngeni ifa ussun an káé Paipel a tongeni pélúweni an kewe kapas eis me álisi lón sókkopaten napanap.

PWAL PPII

Rom 10:13, 14; Fil. 2:3, 4; 1 Pit. 3:8

10

Jon 3:1, 2



Tipeppós

Kapasen Emmwen: “Áúa pwapwa le fang ngenikemi esap chék ewe kapas allimen Kot, nge pwal pwisin manawem pún oua áchengicheng me rem.”—1 Tes. 2:8.

Minne Jises A Féri

1. Katol ei **VIDEO**, are **álleani Jon 3:1, 2**. Mwirin pwóróusfengen wóón ekkei kapas eis:
 - a. Met meefiom, pwata Nikotemus a filaatá an epwe ló chuuri Jises lepwin?—Ppii Jon 12:42, 43.
 - b. Ifa ussun Jises a pwáári pwe i a tipeppós le álisi aramas le wiliiti néún chón káé?

Met Sia Káé Seni Jises?

2. Pokiten sia tongei aramas sia tipeppós le mochen álisiir le wiliiti néún Jises chón káé.



VIDEO: *Jises A Asukula Nikotemus*

Áppirú Jises

3. **Káé lón ewe kulók me leeni mi éch ngeni ewe chón káé.**

Eli epwe sani le filaatá ránin are kulókun ineet epwe káé. Epwe kon sani an epwe káé lón an leenien angang, lón imwan, are lón pwal ekkóch leeni? Iká mi tufich, kopwe ekkesiwili óm schedule pwe ka tongeni fiti an kókkót.

4. **Káé iteitan.** Iká kosap nóm lón ena fansoun itá oupwe káé lón, achocho ngeni an epwe chék fis ewe káé. Ekieki ekkeei mettóch:

- a. Ka tongeni féri ámi káé lón pwal eú rán lón ena wiik?
- b. Ka tongeni káé ngeni wóón phone are video chat?
- c. Ka tongeni tingorei emén an epwe wisen káé ngeni?

5. **Iótek pwe kopwe eáni ekiek pwúng.** Tingorei Jiowa an állillis pwe kosap fangetá wóón noum we chón káé inaamwo iká ese kan kákkáé iteitan are a mmang le apwénúetá met a káé. (Fil. 2:13) Ese mwáál a chómmóng napanap mi múrinné noum na chón káé a eáni, iwe kopwe iótek pwe kopwe nefótófót wóór.

PWAL PPII

SalF. 3:27; Féf. 20:35; 2 Kor. 12:15

11

Mat. 6:25-27



Kapas mi Mecheres

Kapasen Emmwen: “Iká oupwe néúnéú kapas mi weires le weweiti, ifa ussun emén epwe silei minne oua apasa?”—1 Kor. 14:9.

Minne Jises A Féri

1. Katol ei **VIDEO**, are **álleani Mattu 6:25-27**. Mwirin pwóróus-fengen wóón ekkei kapas eis:

- Ifa ussun Jises a áweweei án Jiowa chúnjúkích?
- Inaamwo iká Jises a silei chómmóng mettóch ussun ekkewe machchang, nge met ewe a nefótófót wóón mi chék mecheres? Pwata a eú minen asukul mi múrinné ena?

Met Sia Káé Seni Jises?

2. Lupwen sia eáni asukul mi mecheres, aramas repwe chechchemeni met sia áiti ngeniir me epwe achchúngú letiper.



VIDEO: *Jises A Áweweei Ussun án Semach we Chúnjúkích*

Áppirú Jises

3. **Kosap kon fós chómmóng.** Kopwe nefótófót wóon ewe pwóróus lón ewe puk oua káé me noum we chón káé, lap seni óm apwóróusa meínisin met ka silei ussun eú pwóróus. Mwirin óm eisini eú kapas eis, kopwe mosonottam le witi an epwe pélúweni. Iká ese silei pélúwan are a apasawu och mettóch ese tipeeú ngeni met Paipel a apasa, eáni pwal ekkóch kapas eis pwe epwe álisi le silei pélúwan. Iká a weweiti ewe menlapen pwóróus, iwe mwet ngeni pwal eú.

4. **Álisi noum we chón káé an epwe eririfengeni ekkewe mineféén mettóch a kerán káé ngeni met a fen silei.** Áwewe chék, me mwen oupwe poputááni eú lesen mi fósun ewe manawsefál, ekis pwóróus wóon met ena chón káé a fen silei ussun ekkewe mi máló.

5. **Túmúnúéch lón óm áeá kapas áwewe.** Me mwen óm kopwe eáni eú kapas áwewe, pwisin eisinuk:

- a. ‘Mi mecheres ewe kapas áwewe?’
- b. ‘Epwe mecheres ngeni nei we chón káé le weweiti?’
- c. ‘Epwe álisi nei we chón káé le chemeni ewe menlapen pwóróus nge esap chék ewe kapas áwewe?’

PWAL PPII

Mat. 11:25; Jon 16:12; 1 Kor. 2:1

12

Mark 10:17-22



Tipepwora

Kapasen Emmwen: “Eu kapasen fön seni eman mi mirit ngeni eman mi mochen aüselinga a usun chök efoch ring seni kolt ika usun eu fout seni kolt mi fokun mürina.”—SalF. 25:12.

Minne Jises A Féri

1. Katol ei **VIDEO**, are **álleani Mark 10:17-22**. Mwirin pwóróusfengen wóón ekkeei kapas eis:

- Menni napanap mi mürinné eli Jises a kúna seni ewe alúwél sounemenem?
- Pwata a lamot ngeni Jises tong me pwora lón an éúréúra ewe alúwél?

Met Sia Káé Seni Jises?

2. A lamot sipwe pwáári tong lón ach fós ngeni néúch kewe chón káé, nge pwal affataéchú ngeniir met a lamot repwe féri pwe epwe tongeni lapóló ar ririéch ngeni Jiowa.



VIDEO: *Jises A Éúréúra
Emén Sounemenem
Alúwél mi Pisekisek*

Áppirú Jises

3. Álisi noum we chón káé le isettiw met epwe achocho ngeni me tikeri.

- a. Áeá ewe kinikin “Achocho Ngeni” lón eú me eú lesen lón ewe puk
Eáni Manaw mi Pwapwa Tori Feilfeiló!
- b. Álisi noum we chón káé an epwe esilla met ekkewe mi lamot epwe
féri pwe epwe tikeri ekkewe mettóch a achocho ngeni mi mecheres
le tikeri me ekkewe mi ekis ttam me mwen an epwe tikeri.
- c. Apúnga noum we chón káé iteitan ren an feffaitá.

4. A lamot kopwe silei met a eppetí noum we chón káé an epwe feffaitá, me álisi an epwe okkufu.

- a. Pwisin eisinuk:
 - ‘Iká nei we chón káé ese feffaitá ngeni an epwe fich ngeni papatais,
met a eppetí?’
 - ‘Met úa tongeni féri pwe úpwe álisi?’
- b. Lótek me tingor óm pwora le affataéchú ngeni noum we chón káé met
mi lamot epwe féri, nge kopwe féri ena fán tong.

5. Úkútiw le káé ngeni ewe chón káé ese feffaitá.

- a. Ekieki iká noum we chón káé mi feffaitá ren óm pwisin eisinuk:
 - ‘Nei we chón káé mi apwénúetá met a kákkáé?’
 - ‘Mi kan fiffiti ekkewe mwiich me áiti ngeni ekkewe ekkóch ewe enlet?’
 - ‘Iká a fen káé ren fansoun langattam, mi mochen wiliiti emén Chón
Pwáaraatá Jiowa?’
- b. Iká emén chón káé ese feffaitá:
 - Ereni an epwe ekieki iká met a eppetí an epwe feffaitá.
 - Fán kirekiréch, áweweei ngeni popun kosap chúen sópweeló
óm káé ngeni.
 - Ereni met mi lamot epwe féri iká a mochen káésefál.

Pwóróus mi Enlet Sia Fókkun Mochen Áiti Ngeni Aramas

Jises a erá pwe aramas mi letipwenechar repwe silleni ewe enlet iká ra rong ussun. (Jon 10:4, 27) Ina popun, ese lifilifil ineet sipwe fós ngeni aramas, sia mochen áiti ngeniir ekkewe pwóróus lón Paipel mi mecheres ar repwe weweiti. Sóssót le poputááni óm fós ussun eú pwóróus mi enlet ren óm apasa: “En mi silei pwe . . . ?” are “Ka fen rong pwe . . . ?” Mwirin, néúnéú wokisin mi weneiti met ka fósun le áweweei ena pwóróus mi enlet. Óm chék mwo áiti ngeni emén eú pwóróus seni Paipel mi mecheres, ka tongeni fótuki pwikilin ewe enlet lón letipan, me Kot a tongeni áamáari ena pwikil.—1 Kor. 3:6, 7.



LÓN MWACH

- 1.** Ekkei mettóch mi fiffis iei me napanapen aramas ra pwáári pwe ekiseló chék epwele wor siwil.—Mat. 24:3, 7, 8; Luk 21:10, 11; 2 Tim. 3:1-5.
- 2.** Fénúfan esap fókkun taló.—Kölf. 104:5; SalAf. 1:4.
- 3.** Esap chúen wor met mi atai fénúfan me epwele wiliiti paratis.—Ais. 35:1, 2; Pwár. 11:18.
- 4.** Meinsin repwe meefi péchékkú-len inisiir.—Ais. 33:24; 35:5, 6.
- 5.** Ka tongeni manaw wóon fénúfan tori feilfeiló.—Kölf. 37:29; Mat. 5:5.

FAMILI

- 6.** Ekkewe mwán repwe ‘tongei en me pwúlúwer ussun chék ar tongei pwisin iir.’—Efi. 5:33; Kol. 3:19.
- 7.** Ekkewe fefin repwe fókkun súféliti pwúlúwer.—Efi. 5:33; Kol. 3:18.
- 8.** A lamot ewe mwán me ewe fefin repwe túppwélfengen.—Mal. 2:16; Mat. 19:4-6, 9; Ipru 13:4.
- 9.** Ekkewe naw mi álleasochisi semer me iner repwe sópwéch.—SalF. 1:8, 9; Efi. 6:1-3.

KOT

- 10.** Mi wor iten Kot.—Rom 10:13; Féf. 2:21.
- 11.** Kot a ngenikich eú pwóróus mi áúchea.—2 Tim. 3:16, 17; 2 Pit. 1:20, 21.
- 12.** Kot ese lifilifil aramas.—Tut. 10:17; Féf. 10:34, 35.
- 13.** Kot a mochen álisikich.—Kölf. 46:1; 145:18, 19.



IÓTEK

14. Kot a mochen ach sipwe iótek ngeni.—Kölf. 62:8; 65:2; 1 Pit. 5:7.

15. Ewe Paipel a áiti ngenikich ifa ussun sipwe iótek.—Mat. 6:7-13; Luk 11:1-4.

16. A lamot sipwe iótek iteitan.—Mat. 7:7, 8; 1 Tes. 5:17.



JISES

17. Jises i emén sense mi lap me an emmwén a áilliséch lón ei fansoun.—Mat. 6:14, 15, 34; 7:12.

18. Jises a osuni ussun ekkewe mettóch sia kúkkúna ikenái.—Mat. 24:3, 7, 8, 14; Luk 21:10, 11.

19. Jises i Néún Kot.—Mat. 16:16; Jon 3:16; 1 Jon 4:15.

20. Jises esap i ewe Kot mi Unusen Manaman.—Jon 14:28; 1 Kor. 11:3.



ÁN KOT WE MWÚ

21. Án Kot we Mwú ina eú wesewesen mwú mi nóm lón láng.—Tan. 2:44; 7:13, 14; Mat. 6:9, 10; Pwár. 11:15.

22. Án Kot we Mwú epwe siwili mwúún aramas.—Kölf. 2:7-9; Tan. 2:44.

23. Án Kot we Mwú ina chék ewe mwú epwe pwákini án aramas kewe osukosuk.—Kölf. 37:10, 11; 46:9; Ais. 65:21-23.



RIÁFFÉÚ

24. Esap efisien Kot ach kewe riáfféú.—Tut. 32:4; Jem. 1:13.

25. Setan a nemeni ei fénúfan.—Luk 4:5, 6; 1 Jon 5:19.

26. Kot a kúna óm riáfféú me a mochen álisuk.—Kölf. 34:17-19; Ais. 41:10, 13.

27. Ekiseló chék Kot epwe aúkatiw riáfféú.—Ais. 65:17; Pwár. 21:3, 4.



MÁLÓ

28. Ekkewe mi máló rese silei och mettóch; iir rese riáfféú.—SalAf. 9:5; Jon 11:11-14.

29. Ekkewe mi máló rese tongeni álisikich are efeiengawakich.—Kölf. 146:4; SalAf. 9:6, 10.

30. Aramasach kewe mi máló repwe manawsefál.—Hiop 14:13-15; Jon 5:28, 29; Féf. 24:15.

31. “Esap chúen wor máló.”—Pwár. 21:3, 4; Ais. 25:8.



LAMALAM

32. Esap lamalam meinisin ra apwapwaaí Kot.—Jer. 7:11; Mat. 7:13, 14, 21-23.

33. Kot a oputa likótuputup.—Ais. 29:13; Mik. 3:11; Mark 7:6-8.

34. Tong enlet, ina esissillen ewe lamalam mi enlet.—Mik. 4:3; Jon 13:34, 35.

Itá Kopwe Áukatiw Ámi Pwóróusfengen?

Lupwen emén a eppieta eú kapas eis a enletin mochen silei pélúwan, sia pwapwa le sópweeló ach pwóróusfengen. Sia mochen fós ngeni chókkewe “letiper a páengeni ar repwe etiya ewe enlet mi awora manaw esemuch.”
—Féf. 13:48.

Nge ifa ussun iká emén a song, mochen ánini, are ese mochen fós ngenikich? Fán kinamwe me ésúúfél sipwe áukatiw ach pwóróus ngeni. (SalF. 17:14) Achocho le ló seni ena emén fán kinamwe pwe eli lón fansoun mwach epwe pwal mochen áuseling ngenikich.—1 Pit. 2:12.



Ussun Ach Néúnéú ewe Puk *Eáni Manaw mi Pwapwa Tori Feilfeiló Chék!* le Káé Ngeni Emén

Atun pwiich kewe ra ammólnatá an epwe kawor ewe puk *Eáni Manaw mi Pwapwa Tori Feilfeiló Chék!*, ra iótek fán chómmóng me káéfichi ekkewe pwóróus epwe nóm lón. Ren óm kopwe unusen néúnéúéchú ena puk, apwénúetá ekkee mettóch atun ka káé ngeni emén.

Mwen ewe káé

1. Mmólnefichitá. Atun óm féri ena, ekieki met a lamot ngeni noum we chón káé, nónnómun, me met a lúkú. Ekieki menni pwóróus eli epwe weires ngeni an epwe weweiti are apwénúetá. Ekieki ifa ussun masouen ewe kinikin “Pwal Ekkóch Pwóróus” epwe álisi, me mmólnetá le áiti ngeni atun ámi káé iká mi lamot.

Atun ewe káé

2. Poputááni me asopwaló ewe káé ren iótek iká ewe chón káé a tipeeú ngeni.
3. Kosap kon fós chómmóng. Nefótófót wóon masouen ewe lesen, me mut ngeni ewe chón káé an epwe uwawu meefian.
4. Atun oupwele poputááni eú mineféén kinikin lón ewe puk, álleani ewe kinikin menlapan mi nóm lepoputáán ewe kinikin, me menlapei ekkóch ekkewe itelap lón ena kinikin.





5. Iká oua áwesi eú kinikin, áeá ewe enniwilin kinikin le álisi ewe chón káé an epwe chechchemeni ekkewe pwóróus mi enlet a káé.
6. Atun oupwe káé iteiten lesen:
 - a. Álleani ekkewe parakraf lón ewe áeúin kinikin.
 - b. Álleani meinisín ekkewe wokisin mi mak “Álleani.”
 - c. Álleani ekkewe pwal ekkóch wokisin iká mi lamot.
 - d. Fichi meinisín ekkewe video mi mak “Fichi” (iká mi wor noum).
 - e. Eisini ewe chón káé ekkewe kapas eis.
 - f. Ereni ewe chón káé an epwe katol ewe sasing lón ewe kinikin “Kúttafichi,” me eisini iká met meefian ren.
 - g. Áeá ewe pwóór “Achocho Ngeni” le álisi noum we chón káé le kúna an feffaitá lón an káé. Ka tongeni pesei an epwe achocho ngeni ewe mi fen makketiw, isettiw pwal ekkóch epwe achocho ngeni, are fen féri iir me ruu.
 - h. Eisini iká menni lein ekkewe lesen are video lón ewe kinikin “Pwal Ekkóch Pwóróus” a kon sani atun a ammólnatá ewe lesen.
 - i. Achocho le áwesi eú me eú lesen lón eú fansoun káé.

Mwirin ewe káé

7. Ekieki noum we chón káé. Tingorei Jiowa an epwe efeiéchú an achocho, me fang ngonuk tipáchem pwe kopwe silei ifa ussun kopwe álisi.